



新撰 汪澤 畫地 理地 彙釋

ル 5
133
5





名
133
A

新輯注地里志卷第九

嘉定錢坫著

大興徐松集釋

北海郡景帝中二年置屬青州戶十二萬七千口五十九萬三千一百五十九縣二十六

營陵

在今青州府昌樂縣東南五十里括地志故城在北海縣南三十里

或曰營邱

志齊郡臨淄下云師尚父所封又于此下云或曰營邱兩說並存者不審信也爾雅水出其前曰營邱郭景純云齊之營邱淄水出其南及東則非此矣水經注營邱

城無水唯城北有一水世謂之白狼水則亦以此為非
矣史記武王封太公于營邱胡公徙薄姑獻公徙臨淄
又云營邱邊萊則又以此營邱為是矣

莽曰北海亭

劇魁

疑卽近劇之地賈逵曰小阜曰魁松按一統志劇魁故城在今昌樂縣西北

侯國

武帝元朔二年封菑川懿王子黑

莽曰上符

安邱

今青州府安邱縣太平寰宇記故城在今縣西南十二

里卽渠邱邑也漢為縣伏琛晏謨並言渠邱在安邱城
東北十里按渠邱有二說一說在齊郡西安一說在此
此說出孟康

莽曰誅郅

瓠

河東郡狐讎縣表作瓠讎恐此亦瓠字誤也顏籀之說

非王氏念孫曰韋昭音瓠為諸螫反廣韻入聲二十六

輯瓠之入切縣名在北海則瓠為執之譌明矣至河

東之瓠譌乃瓠之譌字故集韻十一模有瓠云瓠讎晉

侯國

武帝元鼎元年封城陽頃王子息

莽曰道德

涓于

在今安邱縣東北三十里後漢書注太平寰宇記並云故城在安邱縣東北括地志東北三十里應邵曰春秋州公如曹左傳曰涓于公也臣瓚曰州國名涓于公國之所都攷杞改國號曰州居涓于稱涓于公也

益

在今青州府壽光縣南十里

松按一統志作在縣西

晏謨曰南去

齊城五十里

莽曰探陽

後漢書劉盆子傳作探湯水經注作滌蕩

平壽

在今萊州府濰縣東南三十里

松按一統志作西南

括地志後漢

書注並云故城在北海縣也杜預曰平壽故城在白狼

水西

劇

在今青州府臨朐縣西南丹水之西菑川國亦有此縣按水經巨洋水過劇縣西注巨洋又東北逕劇縣西注又云西丹水自凡山北流逕劇縣東又云堯水出劇縣南似巨洋水所逕之劇與堯水所出之劇一劇也西丹水所逕之劇一劇也一在丹水之東一在丹水之西耳

侯國

武帝元朔二年封菑川懿王子錯

都昌

今萊州府昌邑縣

松按一統志在縣西二里

水經濰水過都昌縣東

東北入海通典後漢書注太平寰宇記並云故城在臨

胸縣北似太遠也

松按一統志云在臨胸東北之故城乃劉宋徙治之都昌非漢舊縣章懷

注

有鹽官

平望

在今濰縣西北

松按一統志作在壽光縣東北

後漢書注今北海縣西

北平望臺也伏琛晏謨以為在平壽故城西北八十里

侯國

武帝元朔二年封菑川懿王子賞

莽曰所聚

平的

說見齊郡平廣下史記表作平酌

侯國

武帝元朔二年封菑川懿王子強

柳泉

松按一統志柳泉故城在今益都縣東

侯國

宣帝地節四年封膠東戴王子強

莽曰宏睦

睦本或作陸

壽光

今壽光縣後漢書注今青州縣也

松按一統志云在今壽光縣東

有鹽官莽曰翼平亭

樂望

松按一統志樂望故城在壽光縣東二十里

侯國

宣帝地節四年封膠東戴王子光

饒

侯國

宣帝地節四年封膠東戴王子表作成康侯饒或誤也

是饒康侯成耳

斟

在今壽光縣東北四十里今壽光縣西五十里斟尋國

也此則斟灌國也京相璠曰斟城西北去灌亭九十里

故國禹後

史記禹後有斟氏

桑犢

在今濰縣東南三十里太平寰宇記故城在北海縣東

南三十里說文解字作桑瀆

覆甌山

唐天寶六年勅改爲漑源山今日塔山在濰縣東南六

十里水經注覆甌山世謂之塔山也

漑水所出東北至都昌入海

水經注云世謂之鹿孟水亦曰戾孟水皆非也水逕斟亭西北合白狼水今日東于河北流至濰縣東合寒泥河北入白狼水東北逕長泊南入海

平城

在今昌邑縣南水經注濰水北逕昌安縣東平城亭西應邵曰在濳于縣東北六十里

侯國

成帝建始二年封膠東頃王子邑

密鄉

在今昌邑縣東南二十五里松按一統志作十五里水經注濰水

北逕平城亭西密鄉亭西應邵曰在平城縣東北四十里春秋傳紀子帛莒子盟于密此地也

侯國

成帝建始二年封膠東頃王子林

羊石

侯國

元帝永光三年封膠東頃王子回

樂都

侯國

成帝建始二年封膠東頃王子訢

莽曰拔壘

石鄉

松按今志石鄉下有一作正鄉四字段氏玉裁曰此恐非班語正鄉或作止鄉乃下文上鄉之注譌入此

侯國

元帝永光三年封膠東頃王子理

上鄉

侯國

元帝永光三年封膠東頃王子歛

新成

侯國

元帝永光三年封膠東頃王子根

成鄉

在今安邱縣東北太平寰宇記故城在安邱縣北界高密國亦有此縣

侯國

成帝建始二年封高密頃王子安

莽曰石樂

膠陽

在今萊州府高密縣北松按一統志作西北水經注膠水北逕膠陽縣東應邵曰在濇于縣東南五十里表在琅邪

侯國

元帝初元元年封高密哀王子漢

東萊郡高帝置屬青州戶十萬三千二百九十二口五十萬二千六百九十三縣十七

掖

今萊州府城後漢書注今萊州縣也楚漢春秋有夜侯
蠱達卽此縣古夜掖字通用

莽曰掖通

腫

在今登州府文登縣西七十里太平寰宇記故城在文
登縣西七十里徐廣讀爲縵史記表作鍾

有之罘山祠居山上

山在今登州府福山縣東北三十五里括地志在文登

縣西北一百八十里元和郡縣志一百九十里封禪書

八神五曰陽主祠之罘宣帝置

聲洋丹水所出東北入海

太平御覽引此作梁山丹水所出疑聲洋二字誤也丹
水今日清洋河亦曰義井河原出棲霞縣東南翠屏山

西北流逕縣城南東北逕福山縣東南入于海

平度

在今萊州府平度州西北元和郡縣志故城在膠水縣
西北六十七里

莽曰利盧

黃

在今登州府黃縣東二十五里後漢書注故城在今縣東南太平寰宇記東南二十五里春秋傳齊侯伐萊服虔以為此縣也

有萊山

山在今黃縣東南二十里元和郡縣志在黃縣東南二十里

松林萊君祠

宣帝置封禪書八神六日月主祠之萊山

莽曰意母

臨胸

在今萊州府城北二十里太平寰宇記故城在掖縣北

二十三里

有海水祠

今府城西十八里有海神廟太平寰宇記祠在掖縣西

北十七里

莽曰監胸

曲成

在今登州府招遠縣西五十里後漢書注故城在掖縣

東北太平寰宇記東北六十里

有參山萬里沙祠

山在今萊川府城北五十里沙在府城東北三十里元

和郡縣志沙在掖縣東北三十里孟康曰沙徑三百里

宣帝祠也封禪書八神四曰陰主祠三山顧氏按地里志曲成有三山蓋與參字同

陽邱山治水所出南至計斤入海

即今大沽河也原出黃縣東南盧山南流逕萊陽縣西

松按段氏亦以治水為小沽水出黃縣者為大沽水與全氏同錢氏說誤合小沽河小沽河

出萊州府城東南馬鞍山松按王云馬鞍山即陽邱山在掖縣東南三十里東

南流合大沽河逕膠州東入海大沽河古曰姑小沽河

古曰尤所謂姑尤是也今山無陽邱之目水有兩沽之

稱疑治即沽字之譌矣王氏念孫曰二沽入海之處即漢計斤縣地計斤故城在今膠

州西南又曰尤字古讀若船聲與治相近左傳作尤漢

志作治古今字異耳松按全氏祖望作東萊大沽河

記云漢志太山郡之南武陽東萊郡之曲成皆有治水

親至東萊訪諸古迹方知曲成之治水是沽水左氏不

曰姑尤以西平杜元凱曰姑大沽水也尤小沽水也魏

收地形志曰長廣郡長廣縣有沽水樂永言曰沽水乃

齊境也漢之曲成在今掖縣小沽水出焉其東則黃縣

大沽水出焉逕福山而招遠而萊陽至于平度即墨之

間而合其流三百餘里自東而南直趨膠州之麻灣口

明世議海運者之道也故其時有議東引沽河者若漢

志所云南至臨沂者非臨沂乃計斤也漢之計斤

斤在今膠州即墨之境蓋皆以字形相近而譌

有鹽官

牟平文萊王賦

在今登州府城東南九十里太平寰宇記故城在蓬萊

縣東南九十里十五里太平寰宇記故城在黃縣西南

莽曰望利

東牟

今登州府甯海州後漢書注故城在聞登縣西北元和

郡縣志西北一百十里

有鐵官鹽官莽曰宏德

𦏧

在今黃縣南二十五里太平寰宇記故城在黃縣西南

二十五里說文解字𦏧布出東萊是縣以布得名也

有百支萊王祠

地道記作百枝萊君祠

有鹽官

育犁

今登州海陽縣地太平寰宇記故城在文登縣東南一

百二十里或誤也應作西南明一統志在甯海州東南

一百二十里

昌陽

在今登州府萊陽縣東七十里

松按一統志云在縣東南二十五里昌山南

後漢書注故城在聞登縣西南應邵曰昌水所出宋永

初山水記曰昌陽縣有昌水今出萊陽縣東南昌山西

南流入海

有鹽官莽曰風敬亭

不夜

今登州府榮成縣元和郡縣志故城在文登縣東北八

十五里齊地記古有日夜出見于東境故萊子立此城

以不夜為名

有成山日祠

山在今榮成縣東封禪書入神七日日主祠成山郊祀志作威山古字通也宣帝置祠

莽曰夙夜

當利

在今萊州府城西南三十里太平寰宇記故城在掖縣西南三十六里

有鹽官莽曰東萊亭

盧鄉

在今平度州西北五十里太平寰宇記故城在膠水縣西北五十里

陽樂

在今萊州府城南十三州志在當利縣東北二十里太平寰宇記後漢并入當利表作樂陽

侯國

成帝建始二年封膠東頃王子獲

莽曰延樂

陽石

在今萊州府城東南十三州志當利縣東有陵石城陵石為陽石之誤也太平寰宇記後漢并入當利

莽曰識命

徐鄉

今黃縣地太平寰宇記故城當在黃縣界已失遺址
琅邪郡秦置

始皇二十六年置

莽曰填夷屬徐州戶二十二萬八千九百六十口一百七
萬九千一百有鐵官縣五十一

東武

今青州府諸城縣括地志後漢書注並云今諸城縣也
水經注縣因岡為城周三十里

莽曰祥善

不其

在今萊州府卽墨縣西南二十七里通典後漢書注並

云故城在卽墨縣西南如淳讀其為基云不其山名因

以為縣今山在縣東南四十里淮南子作弗其松按不其有汜

鄉何武所封見武傳

有太乙僊人祠九所

交門宮其一也武帝太始四年起

及明堂武帝所起

海曲

今沂州府日照縣後漢書注故城在莒縣東元和郡縣

志東一百六十里

有鹽官

贛榆

在今海州東北五十里後漢書注今東海縣也元和郡
縣志故城在懷仁縣東北三十里太平寰宇記在東海
縣東北五十里郡國縣道記云在懷仁縣東北三十里
一名鹽倉城

朱虛

在今青州府臨朐縣東六十里括地志故城在臨朐縣
東六十里十三州志丹朱游故虛故曰朱虛

凡山

山在今臨朐縣東北四十里括地志在臨朐縣界朱虛
故縣西北二十里史記五帝本紀東至于海登丸山徐
廣曰丸一作凡裴駙以爲卽此山也郊祀志黃帝封東

泰山禪丸山丸凡字形相近而誤今亦名丹山
丹水所出東北至壽光入海

水經注丹水有二原各道一山世謂之東丹西丹水也
西丹水自凡山北流逕劇縣東東丹水注之水出方山
北逕縣合西丹水亂流東北逕望海臺東注海今西丹
水曰大丹河出丹山東北流逕昌樂縣西北合東丹水
曰小丹河水出昌樂縣南方山北流逕縣城西合大丹
河東北入瀾河亂流入于海

東泰山

山在今臨朐縣南九十里鄭志曰有小泰山公玉帶曰
岐伯令黃帝封泰山卽此是也

段氏玉裁曰東泰山今之沂山也

汶水所出東至安邱入維

水經汶水出朱虛縣泰山北過涪于縣西又東北入于

濰今日東汶水原出沂山東北谷東流逕穆陵關折東

北流又東逕安邱縣西北入濰水古字濰維同用又或

作淮表有東淮侯劉類故今俗亦稱濰水為淮水也錢氏

大昕曰水經有二汶水一出泰山萊蕪縣原山一出朱

虛縣泰山源流各異師古似未見水經故云然松按師

古以前言汶水出萊蕪入濟此又言出朱虛入維將桑

欽所說或有二汶水平又按此言東汶水所以別於禹

貢之汶水也東汶水出

朱虛禹貢汶水出萊蕪

有三山五帝祠

諸

在今諸城縣西南三十里通典後漢書注並云故城在

諸城縣西南太平寰宇記西南三十里春秋傳城諸及
防城諸及鄆此地也武帝紀曰諸邑公主所食故加邑

字

莽曰諸并

梧成

在今青州府安邱縣西南六十里太平寰宇記故城在

安邱縣西南六十里應邵曰在朱虛縣東四十里水經

注作郚城

靈門

今沂州府莒州地太平寰宇記案郡國縣道記曰在莒

縣西南六十里攷其基址似當在其東北非西南也段氏

玉裁曰莒州北百二十里有靈門城

有高泉山壺山浯水所出東北入濰

水經注浯水出浯山世謂之巨平山也其水謂之浯汶
東北逕姑幕縣故城東平昌縣故城北注于濰水今日
大浯水巨平山在安邱縣西南六十里

錢氏大昕曰或云泉乃原之譌

姑幕

在今莒州東北一百六十里後漢書注故城在莒州東
北太平寰宇記東北一百六十里表作姑莫

都尉治或曰薄姑

郡國志樂安博昌縣有薄姑城不在此別一解者亦存
疑也

莽曰季睦

虛水

如淳讀虛為墟

侯國

武帝元鼎元年封城陽頃王子禹

臨原

在今臨朐縣東太平寰宇記故城在臨朐縣

侯國

武帝元朔二年封菑川懿王子始昌

莽曰填夷亭

琅邪

在今諸城縣東南閻氏若璩曰水經注云秦始皇卽句踐故都爲琅邪郡漢因之班志於琅邪縣下注句踐嘗治此則琅邪郡治琅邪縣水經注言故琅邪郡治開陽指東漢時也松按西漢之開陽屬東郡

越王句踐嘗治此起臺館

臺在今諸城縣東南一百四十里琅邪山上括地志在

諸城縣東南一百七十里元和郡縣志一百四十里史

記正義臺在山上吳越春秋越王句踐二十五年徙都

琅邪立觀臺以望東海

有四時祠

宣帝置封禪書八神八曰四時祠琅邪

祓

春秋定公二年盟于拔左傳云郟是拔卽郟也據之則爲今沂州府郟城縣地按封城陽頃王子應在此十三州志朱虛縣東十三里有校亭故縣也太平寰宇記故城在臨朐縣東九十里此以拔爲校字一說也明一統志祓在膠州西南七十里此又一說也封城陽子不應

在膠州疑莫之攷焉松按一統志廢祓縣在膠州西南

侯國

武帝元鼎元年封城陽頃王子霸史記表作校本書表作挾應卽此也然舍此別無以當之本書表又有校靖侯雲亦是年封史記表無之以重出而誤

柜

在今萊州府高密縣南三十里太平寰宇記故城在高密縣西南二十里如涪讀柜爲巨郡國志作拒

根艾水東入海

水經注作拒艾水出柜縣西南拒艾山齊記所謂黔艾山也世謂是水爲洋水今日洋河出膠州西南東流至

靈山衛入海曰洋河口段氏玉裁曰根艾水經注作柜艾

莽曰祓同

松按何義門云莽曰祓同四字疑祓字下注誤入柜下

餅

在今臨朐縣東南太平寰宇記故城在安邱縣南界如

涪讀餅爲瓶松按一統志作在臨朐東北亦作邢又作駢

侯國

武帝元鼎元年封菑川靖王子成

邾

在今諸城縣東水經注作扶

膠水東北至平度入海

水經膠水出黔陬縣膠山北過當利縣西北入于海注齊記曰膠水出五弩山蓋膠山之殊名也今水出膠州

西南鐵櫛山即膠山也北流逕高密縣東濼爲豬澤西

北逕平度州西至海倉西又北入海今日北膠河也南

膠河即拒艾水矣松按北字錢校補王校同王氏念孫曰漢之邾縣在今膠州西南平度故

城在今平度州西北而平度州正當膠州之北不得言東至也今膠水出膠州之膠山北流過高密縣東又北

過平度州西又北過掖縣西又北至海倉口入海

莽曰純德

雱段

表作虜葭

侯國

武帝元鼎元年封城陽頃王子澤

黔陬

在今萊州府膠州西七十里通典後漢書注並云故城

在諸城縣東北太平寰宇記東北一百十里松按黔陬有二故城

在東者曰東陬城在西者曰西黔城二城相去四十里據寰宇記介國在東城錢氏此注似考之未審

故介國也

介葛盧之國袁山松郡國志注云縣有介亭

雲

侯國

武帝元光四年封齊孝王子信

計斤

在今海州贛榆縣南水經注游水逕利成縣西祝其縣

西計斤縣西按太平寰宇記故城在高密縣東南四十

里似非矣春秋傳云介根聲相近書字異也松按計斤故城在膠

州西南古介根邑寰宇記所言是也錢氏謂在贛榆南者誤

莒子始起此

水經注世謂之南莒也若高密縣則非南矣

後徙莒有鹽官
稻

在今高密縣西南太平寰宇記故城舊失其所在應在
高密縣西南

侯國

武帝元光四年封齊孝王子定

皋虞

在今即墨縣東五十里太平寰宇記故城在即墨縣東
北五十里

侯國

武帝元封元年封膠東康王子建

莽曰盈廬

平昌

在今安邱縣西南六十里通典故城在安邱縣南太平
寰宇記在縣南六十里

長廣

在今登州府萊陽縣東五十里太平寰宇記故城在萊
陽縣東五十里

有萊山萊王祠奚養澤在西

在今萊陽縣東元和郡縣志在昌陽縣西北四十里
秦地圖曰劇清地幽州藪

蕭何所收秦圖書是也

有鹽官

橫

在今諸城縣東南三十里松按三當作四太平寰宇記故城在

諸城縣

故山

山在今諸城縣東南四十五里俗稱之曰盧山

久台水所出東南至東武入濰

水經注濰水右合盧水即久台之水也水出故山山在

東武故城東南世謂之盧水也今亦曰盧水俗傳山水

以盧敖得稱非也兗州浸曰盧濰即此齊氏召南曰志

亦作淮如朱虛之汶水曰入濰靈門之涿水橫縣之久

台水折泉之折泉水並曰入淮實皆入濰水耳今俗猶

呼此水為東淮河知自漢已然矣水經注引此志總曰入濰是也

莽曰令邱

東莞

今沂州府沂水縣松按段氏玉裁曰在縣治西北太平寰宇記沂水縣

理即漢故城也孟康曰故鄆邑今鄆亭按鄆有二有西

鄆魯昭公所居者是也東鄆莒魯所爭者是也東鄆即

東莞矣古鄆莞字聲相同通用鄆亭京相璠曰員亭員

鄆字亦通

術水南至下邳入泗

說文解字作沐正字水經沐水出東莞縣西北大弁山

南過陽都縣東入于沂注大弁山與小泰山連麓而異

名也今水出沂水縣北臨朐縣南之沂山東南流逕莒州東郟城縣東南邳州東沭陽縣西注碩項湖東北入于海

過郡三行七百一十里青州濰

過琅邪城陽東海也

魏其

魏其卽不其魏者嵬也當在今卽墨縣東南不其以山氏縣魏其又以山之高氏之

者誤

侯國

武帝元封元年封膠東康王子昌

莽曰青泉

昌

在今諸城縣北

松按一統志作諸城東南

有環山祠

茲鄉

在今諸城縣西北春秋傳所云防茲杜預曰姑幕縣東北有茲亭

侯國

宣帝甘露四年封城陽惠王子宏

箕

在今莒州北太平寰宇記故城在莒縣東北一百餘里

後漢并入東莞

侯國

宣帝甘露四年封城陽荒王子文

禹貢維水北至都昌入海

鄭康成尚書注水出箕屋山說文解字同淮南子出覆舟山水經出濰山注伏琛晏謨以濰水為扶淇之水也今箕屋山在莒州北九十里濰水出焉東流逕諸城縣西北折而北逕高密縣西安邱縣東濰縣東至昌邑縣東入海

松按班志從今文尚書作維說文從古文尚書作濰段氏玉裁曰漢都昌城在今昌邑縣西

過郡三行五百二十里兖州寤也

過琅邪高密北海三郡說文解字作徐州寤

樽

在今莒州東南七十里太平寰宇記故城在莒縣南七十里

夜頭水南入海

疑即今之傅疇河也原出莒州東北高柘山東南流逕日照縣南入海太平寰宇記云向水南至海夜頭向水亦異名

莽曰識命

高廣

在今莒州南太平寰宇記故城在莒縣南界

侯國

宣帝甘露四年封城陽荒王子勳

高鄉

在今莒州東南七十三里太平寰宇記故城在莒州東南七十三里

侯國

宣帝甘露四年封城陽惠王子休

柔

表作棗柔誤為棗也

侯國

宣帝甘露四年封城陽荒王子山

即來

侯國

宣帝甘露四年封城陽荒王子俊

莽曰盛睦

麗

表作麗茲今諸城縣西南三十里常山上有廣麗亭

侯國

成帝建始二年封高密頃王子賜

武鄉

侯國

成帝建始二年封高密頃王子慶

莽曰順理

伊鄉

今海州東南八十里有伊廬山即伊廬之地或即此

侯國

元帝永光三年封城陽戴王子遷

新山

今莒州地太平寰宇記故城在莒縣界

侯國

元帝永光四年封稱忠

高陽

在今高密縣西北三十里太平寰宇記故城在高密縣西北三十四里攷表在東莞是分東莞縣置東莞今沂

水縣與高密東西相去遠寰宇記云云或非也今地志相承用之

侯國

成帝鴻嘉元年封薛宣

昆山

在今諸城縣西南六十里太平寰宇記故城在莒縣界

侯國

元帝初元元年封城陽荒王子光

參封

侯國

元帝永光三年封城陽戴王子嗣

折泉

在今諸城縣西南五十里

松按五當作七

太平寰宇記故城在

莒縣東北水經注作析泉

侯國

元帝初元元年封城陽荒王子根

折泉水北至箕入濰

水經注水出縣北松山今出諸城縣西南分流山東南

入濰

段氏玉裁曰當作析泉水北至箕入濰按俗本析作折箕作莫濰作淮

博石

侯國

元帝初元元年封城陽荒王子淵

房山

今萊州府濰縣西南五十里有方山卽此古方房字同

用

侯國

元帝初元元年封城陽荒王子勇

慎鄉

表作順陽當卽此

侯國

武帝建始二年封膠東頃王子共

駟望

侯國

元帝陽嘉元年封冷廣

莽曰冷鄉

安邱

北海有安邱縣此異地而同名疑名同而地近也

松按

志云漢二安邱在今縣西南者屬北海郡在縣東南者屬琅邪郡

侯國

成帝鴻嘉元年封高密頃王子長

莽曰甯鄉

高陵

史記項羽紀有齊使者高陵君顯功臣表有高陵侯王虞人

侯國

成帝永始二年封翟方進

莽曰蒲睦

臨安

侯國

成帝永始二年封膠東共王子閔

莽曰誠信

石山

侯國

元帝永光三年封城陽戴王子元

東海郡高帝置

楚漢之間曰郟郡

莽曰沂平屬徐州戶三十五萬八千四百一十四口百五十五萬九千三百五十七縣三十八

郟

在今沂州府郟城縣西南後漢書注故城在下邳縣東

北元和郡縣志東北一百五十里應邵讀郟為談今呼

之猶然閻氏若據曰東海郡治郟以于定國及尹翁歸傳知之又曰陳勝傳秦嘉等將兵圍東海守於

郟是秦時郟即為郡治

故國少昊後盈姓

史記秦本紀嬴姓分封以國為姓有徐氏郟氏莒氏按

三國並盈姓盈字通于嬴故史公云爾

蘭陵

在今兗州府嶧縣東五十里元和郡縣志故城在承縣

東六十里十三州志故魯次室邑其後楚取之改為蘭

陵縣攷次室即列女傳所稱漆室也古字漆次通用

莽曰蘭東

襄賁

在今沂州府城西南通典後漢書注並云故城在臨沂

縣南應邵讀賁為肥

莽曰章信

下邳

在今徐州府邳州東三十里應邵曰邳在薛其後徙此

故曰下臣瓚曰有上邳故曰下元和郡縣志今縣理卽邳國城也

葛嶧山在西古文以爲嶧陽

山在今嶧縣東南十里

有鐵官莽曰閏儉

良成

在今邳州北六十里後漢書注故城在下邳縣北太平寰宇記北六十里春秋傳晉會吳子于良此地也

侯國

昭帝始元五年封魯安王子文德

莽曰承翰

平曲

今海州地太平寰宇記故城在朐山縣界郡有二平曲

縣疑亦一地而分兩縣也當時分封侯國有此例

段氏王裁

曰東海不當有兩平曲趙曰恐是前作平曲故莽曰平端後作曲平故莽曰端平

莽曰平端

戚

在今兗州府滕縣南七十里鄭德包愷音憂戚如涪音將毒反李登音千笠反

朐

在今海州南後漢書注故城在朐山縣西通典太平寰宇記並云西南

秦始皇立石海上以爲東門關

在今海州南二里俗稱爲馬耳峰松按隸釋載熹平元年東海廟碑頌云口

關倚傾又碑陰云關者秦始皇所立名之秦東門關

有鐵官

開陽

在今沂州府城北十五里後漢書注故城在臨沂縣北

太平寰宇記北十五里春秋傳曰啟陽也

故鄆國

妘姓國說文解字鄆讀如規渠

莽曰厭虜

費

在今沂州府費縣西北二十里太平寰宇記故城在今

縣西北二十里書費誓說文解字作棐史記作於徐廣

曰一作鮮又作獮世本又作弗攷史記又作鄴惟春秋

傳論語並作費

故魯季氏邑都尉治莽曰順從

利成

在今海州贛榆縣西四十里太平寰宇記故城在懷仁

縣西六十里水經注故利鄉也

莽曰流泉

海曲

郡國志以此作海西接琅邪郡已有海曲縣此作西是

也州郡志臨淮太守領海西令云前漢屬東海後漢屬廣陵又侯表有海西侯李廣利二證為實矣西曲以字形相近而誤在今沂州府城東南太平寰宇記故城在懷仁縣西界與臨沂接境十三州志在開陽東百三十里錢氏大昕曰曲當作西沈約宋志臨淮郡海西縣前漢屬東海後漢晉屬廣陵是也三國志糜竺傳先主轉軍廣陵海西松按段氏引趙曰續志廣陵郡海西故屬東海武帝封李廣利為海西此曲字西之誤也琅邪有海曲東海有海西

莽曰東海亭

蘭祺

表作蘭旗

侯國

昭帝始元五年封魯安王子臨朝

莽曰溥睦

繪

在今嶧縣東八十里括地志故城在承縣後漢書注在承縣東北太平寰宇記縣東八十里說文解字作郃字又作會也

故國禹後莽曰繪治

南成

在今費縣西北七十里松按當作西南九十里元和郡縣志故城

在費縣南九十里即南武城輿地志曰子游為宰者也

松按一統志作南城引史記田敬仲世家檀子守南城則作成者誤

侯國

武帝元光五年封城陽共王子貞

山鄉

侯國

宣帝甘露四年封魯孝王子綰

建鄉

侯國

成帝陽朔四年封魯頃王子康

卽邱

在今沂州府城東南二十里通典後漢書注並云故城在臨沂縣東南孟康曰古祝邱闕駟曰卽祝魯之音

莽曰就信

祝其

在今沂州府城東南五十里太平寰宇記故城在臨沂縣東南五十里史記封黃帝之後于祝服虔以為此縣也攷寰宇記又云故縣在懷仁縣南四十二里舊懷仁廢縣在今海州西九十里說非也臨沂之東南卽贛榆之西今地志家皆云故城在贛榆縣西五十里亦是矣此祝其非春秋傳祝其實夾谷之祝其夾谷之祝其在今濟南府淄川縣蓋名有兩地耳齊魯會盟不應在沂州府

禹貢羽山在南鯤所殛

山在今沂州府郯城縣東北七十里括地志在臨沂縣界元和郡縣志在胸山縣西北一百里博物記東北獨居山西南有淵水即羽淵也

莽曰猶亭

臨沂

在今沂州府城北太平寰宇記臨沂漢舊縣

厚邱

在今淮安府沐陽縣北六十里太平寰宇記故城在沐陽縣北六十里

莽曰祝其亭

容邱

水經注武原水南合武水謂之沭水南至下邳入泗又有桐水出西北容邱縣東南至下邳入泗今沭水合武水在邳州城西北二里則容邱故縣亦應在今州北境矣

侯國

昭帝始元五年封魯安王子方山

桐水東南至下邳入泗

此水今無所攷水經注所記亦畧

東安

在今海州西北八十里太平寰宇記故城在胸山縣西八十三里城陽國有此縣

侯國

宣帝甘露四年封魯孝王子強

莽曰業亭

合鄉

水經注鄆水出合鄉縣西南流入邾今水在滕縣南十五里當在其縣之東北郡國志云合城縣也

莽曰合聚

承

在今嶧縣西太平寰宇記今承縣西南漢故城也按唐承縣在今嶧縣西北則漢城在今縣西應邵音證松按承縣

以承水得名作承音誤

莽曰承治

建陽

在今嶧縣西北後漢書注故城在承縣北

侯國

宣帝甘露四年封魯孝王子咸

莽曰建力

曲陽

在今淮安府安東縣西北後漢書注故城在朐山縣西南太平寰宇記西南一百十里應邵曰在淮曲之陽

莽曰從陽

司吾

在今徐州府宿遷縣北太平寰宇記故城在宿遷縣西
百十里

莽曰息吾

于鄉

泗水國有于縣此則其縣之鄉也

侯國

元帝永光三年封泗水勤王子定

平曲

侯國

宣帝本始元年封廣陵厲王子曾

莽曰端平

都陽

城陽國有陽都縣在今沂州府沂水縣西南後漢書注

云都陽在承縣南則此亦在今嶧縣西南矣疑兩存之

可也應邵曰都陽春秋齊人遷陽是錢氏大昕曰城陽

國陽都縣下亦引應邵此注似有一誤然都陽侯

侯國

元帝永光三年封城陽戴王子音

陰平

在今沐陽縣西北六十里後漢書注故城在承縣西南

太平寰宇記在沐陽縣西北六十里

侯國

成帝陽朔二年封楚孝王子回

郡鄉

在今兗州府泗水縣東南五十里說文解字部東海縣故紀侯之邑蘇林音魚

侯國

成帝陽朔四年封魯頃王子閔

莽曰徐亭

武陽

今鄒城縣地史丹傳云食東海郊之武彊聚

侯國

成帝鴻嘉元年封史丹

莽曰宏亭

新陽

侯國

成帝鴻嘉二年封魯頃王子永

莽曰博聚

建陵

在今沐陽縣西北一百里括地志故縣在承縣界

侯國

宣帝甘露四年封魯孝王子遂

莽曰付亭

昌慮

在今滕縣東南六十里通典後漢書注並云邾國之濫
邑也故城在滕縣東南太平寰宇記東南九十五里

侯國

宣帝甘露四年封魯孝王子宏

莽曰慮聚

都平

侯國

宣帝甘露四年封城陽荒王子邱

臨淮郡武帝元狩六年置莽曰淮平戶二十六萬八千二

百八十三口百二十三萬七千七百六十四縣二十九

錢氏大昕曰臨淮郡當屬徐州志失書晉志漢武帝分
沛東陽置臨淮郡東陽楚漢之際所置郡也漢初屬吳

國

徐

在今徐州府城東北括地志泗州徐城縣北三十里古

徐國即淮夷也太平寰宇記故城在臨淮縣西五十里

閻氏若璩曰臨
淮郡治徐縣

故國盈姓至春秋時徐子章禹為吳所滅莽曰徐調

取慮

在今泗州北一百二十里俗曰僮都城後漢書太平寰

宇記並云故城在下邳縣西南如涇讀取為陬訾慮為

邾婁顧輿王讀如秋閻松按如涇說
見左傳釋文

淮浦

在今淮安府沐陽縣東南應邵曰淮涯也黃氏儀曰水經淮水東過

淮陰縣北又東至廣陵淮浦縣入于海漢之淮浦今安東縣見尙書古文疏證

游水北入海

古者水上流稱游水經注淮水于縣枝分北為游水歷胸縣與沫合又逕胸山西利成縣東羽山西祝其縣西計斤縣西贛榆縣北紀鄆城南東北入海今無所攷而于安東縣北有鹽河東北流合碩項青伊二湖太約即游水故流為湖水所浸溢而斷蝕也

莽曰淮敬

盱眙

今泗州盱眙縣後漢書注楚州縣也章昭音吁夷應邵

音吁怡鄭德音煦怡史記高帝紀作盱台

都尉治莽曰武匡

水經注作匡武

去猶

故泗州也今歿于湖

莽曰秉義

水經注太平御覽並作康義

僮

在今泗州東北七十里通典故城在宿遷縣西南後漢書注在宿預縣西南太平寰宇記明一統志並云在虹縣東北七十里今泗州即虹縣也水經注作僮云縣以

水得名今潼水在五河縣東北合沱水入淮

段氏玉裁曰僅淮水

莽曰成信

射陽

今淮安府城後漢書注故城在安宜縣東太平寰宇記
山陽縣也應邵曰在射水之陽水經注自廣陵出山陽
白馬湖逕山陽城西即射陽縣之故城寰宇記射陽湖
在山陽縣東南八十里即射陂今湖在府城東南七十
里射亦為貫字

莽曰監淮亭

開陽

東海亦有此縣

贅其

高山

應邵曰高山在東南

睢陵

在今邳州東南通典後漢書注太平寰宇記並云故城
在下邳縣東南

莽曰睢陸

鹽瀆

今淮安府鹽城縣太平寰宇記鹽城縣也

有鐵官

淮陰

在今淮安府城西北四十里太平寰宇記故城在山陽縣水經注城北臨淮水

莽曰嘉信

淮陵

在今盱眙縣西八十里太平寰宇記故城在招信縣西北二十五里

莽曰淮陸

下相

在今宿遷縣西北七十里元和郡縣志故城在宿遷縣西北七十里沛郡有相縣故如下

莽曰從德

富陵

在今盱眙縣東北六十里括地志故城在盱眙縣東北六十里

莽曰櫟虜

相傳此字音朔

東陽

在今盱眙縣東七十五里通典故城在盱眙縣東太平寰宇記東七十五里

播旌

郡國志作潘旌

莽曰著信

西平

據恩澤侯表此下應有侯國二字蓋宣帝以封于定國傳子至孫至更始元年始絕

莽曰永聚

高平

侯國

元帝河平二年封王逢時

莽曰成邱

開陵

應今沂州府西南近邳州界地

侯國

武帝元封元年封故東越建成侯敖

莽曰成鄉

昌陽

侯國

成帝永始二年封泗水戾王子霸

廣平

侯國

元帝建昭四年封廣陵孝王子德

莽曰平甯

蘭陵

東海有蘭陵當亦一地而為二縣也
松按蘭陵漢書作蘭陽錢氏蓋據誤

侯國

元帝建昭五年封廣陵孝王子宣

莽曰建節

襄平

侯國

元帝永光五年封廣陵厲王子疊

莽曰相平

海陵

今揚州府泰州
松按枚乘傳注臣瓚曰海陵縣名有吳太倉

有江海會祠莽曰亭間

輿

晉書徐甯傳甯為輿縣令時廷尉桓彝去職之廣陵尋親舊還遇風停浦中上岸見一解署云是輿縣彝造之據之則與海陵當相近

莽曰美德

堂邑

今江甯府六合縣春秋時曰棠通典伍尚為棠邑大夫此縣也

有鐵官

樂陵

侯國

宣帝地節四年封史高

新輯注地里志卷第九終

新輯注地里志卷第十

嘉定錢坫著

大興徐松集釋

會稽郡秦置

始皇二十五年置

高帝六年為荆國

立劉賈也高帝紀以故東陽郡鄣郡吳郡五十一縣立為王秦無吳郡之目當亦楚漢之間所分置

十二年更名

封沛侯劉濞

景帝四年屬江都

景帝三年濞反國亡以其地屬江都易王非也至武帝

元狩二年非子王建坐謀反自殺始為郡史記五宗世家云非以孝景前二年為汝南王二歲徙為江都王治吳故國

屬揚州戶二十二萬三千三十八口百三萬二千六百四縣二十六

吳

今蘇州府城

閻氏若據曰會稽郡治吳以嚴助朱買臣及梅福傳知之又曰秦時會稽郡即治吳

故項籍傳云初起兵吳也

故國周太伯所邑

泰伯都在今常州府無錫縣東南四十里梅里至王僚二十三君並居焉闔閭始遷此越紐吳大城闔閭所築

具區澤在西揚州藪古文以為震澤

澤在今府城南五十里史記正義在蘇州西四十五里

水經注在吳縣南五十里

南江在南東入海揚州川

禹貢三江之南江也今日吳松江亦曰笠澤受蘇州府城東南湖水東流至上海縣北入海南江與五湖一也

松按吳松江是禹貢之中江錢氏以之釋南江誤矣

莽曰秦德

曲阿

今鎮江府丹陽縣後漢書注今潤州縣也南史宋高祖紀丹徒候山其地秦史所謂曲阿

故雲陽

元和郡縣志秦時望氣者云有王氣鑿之以敗其勢截其直道使之阿曲故曰曲阿

莽曰風美

烏傷

在今金華府義烏縣東後漢書注故城在義烏縣東

莽曰烏孝

毗陵

今常州府城後漢書注今晉陵縣也

季札所居

皇覽延陵季子冢在縣暨陽鄉至今吏民皆祀之越紐

縣南城在荒連上湖中冢者季子冢也名延陵虛在今

常州府江陰縣西三十里申浦之南

北江在北東入海揚州川

禹貢三江之北江也今經流江也在常州府靖江縣南

江陰縣北東逕太倉州北入海

莽曰毗壇

餘暨

今紹興府蕭山縣應邵曰闔閭弟夫槩王之所邑按夫暨似不得遠居越地也

蕭山

山在今蕭山縣治西

潘水所出東入海

郡國志作潛水水經注潘水即浦陽江之別名自外無

水以應之今江出浦江縣西深裊山東流逕縣城南折

而北逕諸暨縣東蕭山縣北入海全氏祖望浦陽江記云浦陽江水發源義

鳥分於諸暨是為曹娥錢清二江考浦陽之名漢時所未有故班志不錄然班志於浦陽東道之水則曰柯水而系之上虞即曹娥也西道之水則曰潘水而

系之餘暨即錢清也續志則有潘水而失柯水

莽曰餘衍

松按宋本漢志作餘衍

陽羨

在今常州府荆溪縣南後漢書注故城在義興縣南元

和邵縣志在荆溪南安今荆溪縣西南三里有荆南山

荆溪在山之北也

諸暨

今紹興府諸暨縣國語云句踐之地南至句無即其縣

也韋昭曰縣有句無亭

莽曰疏虜

無錫

今常州府無錫縣

有歷山

山在今縣西北三十里

春申君歲祠以牛莽曰有錫

山陰

今紹興府城越紐曰句踐小城山陰是也

會稽山在南上有禹冢禹井揚州山

山在今府城東南十二里皇覽禹冢在會稽山上會稽山本名苗山在縣南七里括地志禹陵在會稽縣南十三里廟在縣東南十一里越紐禹到大越上苗山大會計爵有德封有功因更名苗山曰會稽病死葬葦棺穿壙深七尺上無瀉泄下無邸水壇高三尺土階三等周方一畝水經注山南有劓去廟七里謂之禹井

越王句踐本國有靈文園

史記外戚世家薄父死山陰文帝追尊為靈文侯會稽郡置園邑三百家長丞以下吏奉守冢寢廟上食祠如

法冢墓記薄父冢在會稽縣西北禿山上

丹徒

在今鎮江府城東南十八里括地志故城在丹徒縣東南十八里吳地記朱方秦改曰丹徒吳錄朱方後名谷陽秦望氣者云其地有天子氣始皇使赭衣徒三千人鑿長坑敗其勢改名丹徒

餘姚

今紹興府餘姚縣元和郡縣志越州縣也周處風土記舜後支庶所封故曰餘姚

婁

故城無可攷據元和郡縣志則今蘇州府崑山縣西之

信義鎮其地也

有南武城闔閭所起以候越

今松江府城東六十五里夾江有二城相傳爲闔閭所築疑卽此也

莽曰婁治

上虞

在今餘姚縣西後漢書注太平寰宇記並云故城在餘姚縣西會稽舊記云舜上虞人去虞三十里有姚邱舜所生也按舜生姚墟出孝經援神契其地皆無定說唯周處以餘姚爲舜支庶所封此上虞當亦因此而涉其稱耳舊記之說恐謬

有仇亭柯水東入海

疑卽今之上虞江也東原出天台西原出東陽合而北流逕新昌縣北嵎縣南又東北爲曹娥江逕上虞縣西北至瀝海所西入海

莽曰會稽

海鹽故武原鄉

越紐武原今海鹽郡國志順帝時陷而爲湖今謂爲當湖城郭之處可識元和郡縣志縣城陷爲柘湖移于武原後又陷爲當湖柘湖在今松江府華亭縣南當湖在今嘉興府平湖縣東

有鹽官

今嘉興府海鹽縣卽漢鹽官地也

莽曰展武

剡

在今紹興府嵊縣西南十二里元和郡縣志故城在剡縣西南十二里

莽曰盡忠

由拳

在今嘉興府城南五里後漢書注故城在嘉興縣南太平寰宇記南五里水經注作由卷吳錄吳王時地名長水秦改曰由拳干寶搜神記秦始皇東巡望氣者云五百年後江東有天子氣始皇乃令囚徒十萬人掘汗其

地表以惡名故改之曰由拳縣

柴辟故就李鄉吳越戰地

卽樵李聲相同通用也在今府城西南四十五里越紐語兒鄉故越界名曰就李吳疆越地以爲戰地至于柴辟亭

太末

今衢州府龍游縣後漢書注今龍邱縣春秋之姑蔑也越紐作姑末古字蔑末通用孟康讀太爲闔水經注縣越之西鄙

穀水東北至錢塘入江

今日穀溪在龍游縣北五里卽信安江也原出開化縣

西北馬金領東北百際領兩領之水合而南流逕縣南
又東南逕常山縣北曰金川溪合江山縣之文溪曰雙
港口東北流逕衢州府城北龍游縣北合遂昌縣之桃
溪曰穀溪亦曰盈川溪也又東北逕湯溪縣西蘭溪縣
西合東陽縣之東陽江北流逕嚴州府城東南而與新
安江會卽浙江也云自錢塘入江者蓋江自嚴州府以
下兩江互受通稱矣段氏玉裁曰水經注漸江水篇引
地里志穀水自太未東北至錢塘
入浙
莽曰未治
烏程
今湖州府城後漢書注今湖州縣也

有歐陽亭

句章

在今甯波府慈溪縣西南十五里後漢書注太平寰宇
記並云故城在鄞縣西

渠水東入海

今上虞江自上虞縣西北支流分出東逕臨山衛南慈
溪縣南又東入海疑卽此也

餘杭

在今杭州府餘杭縣南苕水之南後漢熹平中徙水北
尋亦復故顧夷曰秦始皇至會稽經此立爲縣孟康讀
杭爲行伍

莽曰進睦

水經注作淮睦

鄞

在今甯波府奉化縣東五十里通典後漢書注並云故城在鄞縣東南太平寰宇記在南

有鎮亭

今有鎮亭山在奉化縣西南一百里

有鮎埼亭

今有鮎埼山在奉化縣東五十五里說文解字漢律會稽郡獻鮎醬卽出此縣

東南有天門水入海

疑卽今之奉化江也在奉化縣北四十五里俗名北渡

江下流曰甬江東入海

有越天門山

山在今甯波府象山縣南一百二十里

莽曰謹

錢塘

今杭州府城後漢書注今杭州縣也

西部都尉治武林山

山在今府城南十五里

段氏玉裁曰楊雄傳東南一尉孟康曰會稽東部都尉也如淳

曰地理志云在會稽今志錢塘西部都尉回浦南部都尉無東部且二尉非一尉俟考

武林水所出東入海行八百三十里

闕駟曰武林山錢水出焉吳地記縣唯有浙江今無此
水按卽今西湖也在今府城西周三十里其水引貫城
而東出灌甯海縣田

莽曰泉亭

鄮

在今甯波府城東三十里後漢書注越州縣也元和郡
縣志明州縣也孟康音貿

莽曰海治

富春

今杭州府富陽縣後漢書注今杭州富春縣也越紐云
富中卽此

莽曰誅歲

治

今福州府城後漢書注東治太康地志云漢武帝名爲
東治後改爲東候官今泉州閩縣是西南夷傳閩越王
都治嚴助傳閩王以八月舉兵于治南蘇林曰治南山
名今名東治

回浦

在今台州府城東一百十五里後漢書注故城在臨海

縣東南

閩氏若據曰秦閩中郡治
回浦縣東漢更名章安

東部都尉治

舊本作南部太平御覽引作東部輿地記云永嘉郡本

會稽東部地則作東為是今依改正何氏焯曰金石錄有永平八年所造

東部都尉路君闕吳志亦云張紘為東部都尉

丹陽郡故鄣郡

楚漢之間郡名也何氏焯曰晉書地理志丹陽郡丹陽山多赤柳在西是丹陽當從木明矣
銅官即吳王濞傳所云章郡銅山錢氏大昕曰劉原父謂秦三十六郡無鄣郡疑鄣非郡名武帝以故鄣地為丹陽郡志但當云故鄣屬江都非是議班氏之誤此真謬說也志云故梁故鄣淮南故齊故楚皆謂諸侯王國鄣非國名何以得稱故鄣乎秦無鄣郡而楚漢之際則有之高帝紀以故東陽郡鄣郡吳郡五十三縣立荆王是

景帝三年屬江都武帝元狩二年更名丹陽

舊本無景帝三年四字元狩作元封攷江都王建以元

狩二年自殺國除非元封也並依州郡志改正

屬揚州戶十萬七千五百四十一口四十萬五千一百七十一有銅官縣十七

宛陵

今甯國府城元和郡縣志宣城縣也

彭澤聚在西南清水西北至蕪湖入江

說文解字泔水出宛陵西北入江泔水即清水也今日清弋江原出旌德縣東鳧山西北流逕涇縣東合廬江下流曰清弋江至蕪湖縣南入江

莽曰無宛

於晉

今杭州府於潛縣十三州志晉讀爲潛

江乘

在今江甯府句容縣北六十里括地志故城在今句容縣北六十里

莽曰相武

春穀

在今甯國府南陵縣西一百五十里元和郡縣志故城在南陵縣西一百五十里

秣陵

今江甯府城元和郡縣志太平寰宇記並云故城在上元縣東南四里吳錄張紘言于孫權曰秣陵楚武王所

置名爲金陵秦始皇望氣故岬斷連岡名爲秣陵

莽曰宣亭

故鄣

在今湖州府長興縣西南八十里括地志故城在長興縣西南八十里通典太平寰宇記並云在西八十里地里通釋在長興縣西南越紐文帝前九年會稽并故鄣郡太守治故鄣都尉治山陰前十六年太守治吳郡都

尉治錢塘孝武元狩二年以故鄣爲丹陽郡閩氏若璩曰秦鄣郡

治鄣縣漢以郡去而名其縣曰故鄣丹陽郡所領唐湖州長城縣西八十里有鄣郡故城

莽曰候望

句容

今句容縣後漢書注今潤州縣也

涇

在今甯國府涇縣東南通典後漢書注並云故城在涇縣東南韋昭曰涇水出蕪湖今水在涇縣城西即清水也

丹陽

在今太平府城東元和郡縣志當塗縣也風土記丹湖在丹陽今日丹陽湖在府城東南七十里湖周三百餘里

楚之先熊繹所封十八世文王徙郢

此志之誤證也楚先所封之丹陽不在此

王氏楙曰熊繹所封在南

郡秭歸之丹陽漢志以宛陵丹陽當之誤矣

石城

在今池州府城西七十里

分江水首受江東至餘姚入海

今無是水水經注據志合分江與南江為一似亦非

此即南江也錢氏既以南江釋中江故此處祇云今無是水也閻氏若璩又以餘姚在浙江東岸又中隔宣歙諸水不得越而東過餘姚以入海近阮氏元作三江考始訂正之可謂班氏功臣矣洪氏亮吉作分江水考細校水經注知分江水與南江為一足破錢氏之誤

過郡二行千二百里

過丹陽會稽二郡

胡孰

在今江甯府城東南五十里元和郡縣志故城在上元

縣東南七十里郡國志作湖孰錢氏大昕曰胡孰續志作湖熟今上元縣東南

五十里有湖熟鎮即漢故縣所在自漢至晉有湖熟縣無姑孰縣宋祁謂胡當作姑者非是

陵陽

在今池州府青陽縣南六十里

桑欽言淮水出東南北入大江

即今大通河也原曰五溪河出青陽縣南山北流逕縣

城西南西北至大通鎮南入江志于廬江郡云淮水出

又云廬江水出陵陽東南北入江互證者似桑氏以廬

江水為淮水也

蕪湖

在今太平府蕪湖縣東三十里通典後漢書注並云故

城在當塗縣西南元和郡縣志在縣西南八十里漢于

湖側置縣

中江出西南東至陽羨入海揚州川

禹貢三江之中江也太平寰宇記以為即荆溪水今原

已斷以義求之則蕪湖縣湖也與丹陽湖合由湖南出

逕高淳縣東南曰胥湖至溧陽縣南曰永陽江荆溪縣

北曰荆溪東入太湖段氏玉裁曰今蕪湖河東接太平

府南之黃池河又東接溧水縣之固城丹陽石臼諸湖未築東壩以前諸湖匯長蕩湖而

入太湖而入于海此正古中江之道今則壩西諸水俱

黟

今徽州府黟縣水經注縣居黟山之陽故縣氏之韋昭
讀黟為伊松按黟今漢志作黟字誤故錢氏改之段氏校曰說文黟下曰丹楊有黟縣是此字作黟明甚師古不能正其誤乃云黟音伊黟不得音伊也又曰本作黟其音同黟黟不得合為一字黟亦不得音伊黟從多聲轉讀烟奚切王校同

漸江水出南蠻夷中東入海

莊子之制河也水經漸江出三天子都北過餘杭東入海注山海經謂之浙江也浙晉灼音逝古制浙字聲相同通用唐盧潘引此云出黟縣南率山率與蠻字形相近而誤耳今率山在休甯縣東南四十里其水出山東流逕徽州府城西南曰新安江又逕淳安縣南壽昌縣北嚴州府城南折而東北曰富春江又逕桐廬縣東南

新城縣東南富陽縣南又東曰錢塘江折而北逕杭州

府城南蕭山縣西北至海甯州南入于海宋氏祁曰漸大昕曰水經本作漸江水子京失考趙氏一清曰羅願新安小志云蠻中乃率山之譌仍衍夷字彼中撰志者乃造為率山率水之稱何可拾其餘唾乎

成帝鴻嘉二年為廣德王國

封中山憲王孫雲客州郡志宣城太守領廣德令何志

云漢舊縣二漢志並無疑是吳所立非也松按何志云漢舊縣乃何

承天宋志之文二漢志並無疑是吳所立乃沈約之語宋羅願新安志云按吳志呂蒙領廣德長吳錄張統補廣德令是廣德在吳為縣特不知所屬至晉武帝太康元年平吳乃以廣德縣隸宣城郡錢氏以為非吳立縣蓋未見羅志耳

莽曰愬虜

溧陽

今鎮江府溧陽縣後漢書注今宣州縣也應邵曰溧水所出南湖也說文解字溧水出丹陽在今溧陽縣西北四十里史記范雎傳伍子胥至于陵水劉氏曰即溧水陵溧聲相近

歙

今徽州府城有歙浦在縣東南五十里

都尉治

宣城

在今甯國府南陵縣東通典後漢書注並云故城在南陵縣東

豫章郡高帝置

秦為廬江南部高帝六年分置也漢官儀豫章樟樹生庭中水經注樹高七丈五尺大二十五圍
莽曰九江屬揚州戶六萬七千四百六十二口三十五萬一千九百六十五縣十八

南昌

在今南昌府城東後漢書注今豫章縣水經注秦以為廬江郡治高祖六年始命陳嬰以為豫章郡治城即嬰所築也

閻氏若璩曰豫章郡治南昌縣

莽曰官善

廬陵

在今吉安府泰和縣北三十里以安成縣水得名
莽曰桓亭

彭澤

在今南康府都昌縣北五十里元和郡縣志故城在都
昌縣北四十五里

禹貢彭蠡澤在西

在今都昌縣西一名宮亭湖亦曰鄱陽湖東西廣四十
五里至百里南北長三百里

鄱陽

在今饒州府城東六十里通典後漢書注並云故城在
今縣東孟康音婆韋昭音蒲何反陳涉傳番盜英布番

卽鄱也古字通

武陽鄉右十餘里有黃金采

武陽鄉在今饒州府城西北一百二十里史記索隱云
今豫章北二百里接鄱陽界地名白沙沙東南八十里
有武陽亭

鄱水西入湖漢

今婺河也原出徽州府婺原縣北大廣山西南流折而
西逕樂平縣北折而北又西至饒州府城南入彭蠡古
則會湖漢以入彭蠡今或不同然湖漢彭蠡亦互受通
稱也

莽曰鄉亭

歷陵

今九江府德安縣通典潯陽縣有蒲塘驛卽歷陵縣太平寰宇記德安縣卽蒲塘置

傅易山傅易川在南古文以爲傅淺原

山在今德安縣南十二里太平寰宇記在德安縣南十三里裴駟曰敷淺原一名博陽山古字傅博敷皆通用

莽曰蒲亭

松按宋本漢志作蒲立

餘汗

今饒州府餘汗縣應邵音汗爲干巖助傳作餘干餘水在北至鄔陽入湖漢

今日三餘河原出萬年縣東北仙鶴山西北流逕縣城

東南至餘干縣東北而與婺河合下流曰昌江昌江原出祁門縣北大共山西北流逕浮梁縣東南至饒州府

城東南而與婺河合二河既合曰鄱水志鄱餘二水俱入湖漢今餘水入鄱鄱水入彭蠡

王氏念孫曰北在上字衍文

莽曰治干

柴桑

在今九江府城南九十里元和郡縣志故城在尋陽縣西南二十里太平寰宇記尋陽縣楚城驛故縣也

莽曰九江亭

艾

在今南昌府義甯州西一百里後漢書注故城在建昌縣吳公子慶忌所居邑也

脩水東北至彭澤入湖漢

今日西河原出義甯州西南大阜山東南流折而北逕州城西南折而東逕武甯縣南折而南至建昌縣南入贛江水經注作循水字形相近而誤

行六百六十里莽曰治翰

贛

今贛州府城太平寰宇記虔州西南益漿故城是也如

涓音感

豫章水出西南北入大江

山海經贛水出聶都山水經贛水出豫章南壆縣西北過贛縣東北入于江注湖漢及贛通稱也蓋水有兩原北原曰湖漢水南原曰豫章水今南原出長汀縣西北山西流逕瑞金縣南會昌縣東北折而北逕雩都縣南而與北原合至贛州府城北曰贛江又逕萬安縣西南泰和縣東南吉安府城東吉水縣西峽江縣東南新淦縣西北臨江府城東豐城縣西南昌府城西南下流爲彭蠡湖入江

新淦

在今臨江府城東六十里太平寰宇記故城去今縣六十里按今新淦縣在府城南七十里也應邵曰淦水所

出西入湖漢今日泥江原出縣東山西北流入贛江

都尉治莽曰偶亭

南城

今建昌府城

盱水西北至南昌入湖漢

今日東江也原出廣昌縣南血木領東北流逕縣城南

南豐縣東南折而北逕建昌府城東折而西逕撫州府

西北進賢縣西南至南昌府南入贛江

建成

今瑞州府城太平寰宇記今筠州城即漢故縣

蜀水東至南昌入湖漢

今日錦江也原出萬載縣西北大圍山東流逕縣城北

上高縣西南瑞州府西南南昌府西入贛江水經注作

濁水

莽曰多聚

宜春

今袁州府城後漢書注今袁州縣也

南水東至新淦入湖漢

今日秀江也原出萍鄉縣東南羅篁山東北流逕袁州

府城東北折而南逕分宜縣西南新喻縣南折而北逕

臨江府城東入贛江水經注作牽水一本作索水皆以

字形相近而誤王氏念孫曰南水當為牽水水經注曰牽水西出宜春縣東逕新淦縣而注于

豫章水湖漢及
贛並通稱也

莽曰修曉

海昏

在今南康府建昌縣東北元和郡縣志故城在建昌縣東三里昌邑王賀所封

莽曰宜生

雩都

在今贛州府雩都縣東四里元和郡縣志虔州縣也

湖漢水東至彭澤入江

贛江北原也原出今甯都州北梅領東南流逕州城東折而西逕雩都縣南而與南原會下流為彭蠡湖入江

行千九百八十里

鄔陽

在今饒州府城西北一百二十里太平寰宇記故城在鄔陽縣西北一百二十里鄔陽記曰縣高祖六年置

莽曰豫章

南壆

在今南安府南康縣西南松按淮南書曰始皇使尉屠睢發卒五十萬為五軍一軍守鐔成之嶺一軍守九疑之寨一軍處番禺之都一軍守南壆之界一軍結餘干之水南壆當卽此南壆

彭水東入湖漢

今日章水原出桂陽縣東孤山東流逕南安府城北南康縣南至贛州府城北入贛江

安平

今吉安府安福縣太平寰宇記故城在安福縣南一百步

侯國

元帝初元元年封長沙孝王子習

莽曰安甯

桂陽郡高帝置

二年分長沙置

莽曰南平屬荊州戶二萬八千一百六十九口十五萬六千四百八十八有金官縣十一

松按金官宋本漢志作鐵官

郴

今郴州如淳音緜

閻氏若璩曰桂陽郡治郴縣

耒山

山在今郴州桂陽縣南五里水經以為郴縣南山

耒水所出西至湘南入湖

今日郴江原出桂陽縣南山西北流逕縣南又逕興甯縣南而與郴州之水會水出州南黃岑山北流逕州城東南合耒水下流統名之曰郴江又東北逕永興縣西耒陽縣東至衡州府城西北入湘江此云入湖蓋挾鄱入湖也王氏念孫曰入湖當作入湘水經曰耒水出桂陽縣南山北入於湘湘水注引地理志曰郴縣有耒水出山西南至湘南入湘是其證

項羽所立義帝都此

文穎曰縣有義帝冢湘中記曰有義帝祠曰義陵祠今

冢祠並在州城內

莽曰宣風

臨武

今桂陽州臨武縣後漢書注今郴州縣也因縣西有武

水故氏之

段氏玉裁曰漢縣在今縣東五十里

秦水東南至滇陽入淮行七百里

說文解字作溱山海經肆水出臨武西南即此水也水

經溱水出臨武縣南過滇陽淮浦關與桂水合南入于

海志秦水入淮淮水入鬱鬱水入海水經溱水會桂水

入海淮水即桂水又會鬱入于海耳今日樂昌水也原

出臨武縣西南山東北流逕宜章縣西南折東南至樂

昌縣西南合東來一水下流曰樂昌水又逕猺山東至

韶州府城西南入滇江云至滇陽者蓋自韶州府又西

南至英德縣東合淮水始為秦水之委耳今自韶州府

以下曰始興江亦通謂之滇江焉

松按原志作入滙錢校改滙王校同段氏

玉裁曰秦水他書皆作溱水師古注不言秦音臻然則

此作秦鄭溱洧作溱為正王氏念孫曰漢成陽令唐扶

頌曰賦政于外爰及鬼方匪夷來降寇賦逆亡匪夷謂

匪水上之夷上文曰除豫章鄒陽長夷粵搆梃強難

化以今地考之匪水發源於連州南至廣州府之三

縣入于鬱水西謂之於漢為桂陽南海兩郡地也

便

莽曰大武

今郴州永興縣此字相傳音鞭

莽曰便屏

南平

在今桂陽州藍山縣東五里元和郡縣志藍山縣也

耒陽

今衡州府耒陽縣元和郡縣志耒陽縣也說文解字作

耒

春山春水所出北至鄱入湖

今日烏江下流曰舜水也舜水原出藍山縣西南九疑

山杞林東北流逕縣城南又逕嘉禾縣南而得春水口

春水原出新田縣西北春陵山曰烏江東南流與藍山

水會而北流逕新田縣東桂陽州西北耒陽縣西又東

北入湘江云至鄱入湖者亦挾湖以入湘耳

過郡二行七百八十里

過桂陽長沙二郡

莽曰南平亭

桂陽

今連州後漢書注今連州縣也

漚水南至四會入鬱林

本漚作漚非也徐廣曰漚水一名湟水水經注作漚水

攷古湟漚同聲漚水又即桂水桂漚亦同聲也說文解

字漚水出桂陽盧聚山至漚浦關為桂水水經注同是

滙桂一水二名矣今水原出連山縣西南東流逕縣城南連州西折南流逕陽山縣西又東南逕英德縣西南得濠水曰瀆江云至四會入鬱林者蓋自英德縣折西南流又逕清遠縣東南四會縣東三水縣西而入江也瀆江亦曰北江粵東有三大江曰北江東江西江皆彙廣州府入海者也松按段氏亦作入鬱謂鬱者今廣東之北江王氏念孫曰宋祁云景本鬱下無林字當從之水經曰濠水過瀆陽縣出滙浦關與桂水合柳滙南入于海注云濠水南注于鬱而入于海是其證段氏玉裁曰滙水之出滙浦關在今清遠縣

過郡二行九百里

過桂陽南海二郡

陽山

今連州陽山縣元和郡縣志陽山縣也在九疑山之陽故得稱

侯國

元帝初元元年封長沙孝王子宗

曲江

今韶州府城後漢書注今韶州縣也周憬功勳銘作曲

紅水經注曲紅山名東連岡是矣松按周憬碑陰載曲紅長含滙長瀆陽長

是諸縣皆非大縣

莽曰除虜

含滙

在今韶州府英德縣西七十里後漢書注故城在含滙

縣東元和郡縣志洽涯本漢舊縣地里志洽字無水故城在今縣東四里

澧陽

今英德縣後漢書注今廣州縣太平寰宇記澧陽縣也鄭德讀澧為檉孟康為貞蘇林音檉挂之檉應邵曰澧水出南海龍川西入溱如應說則即今之東江矣不能西入溱非也依義則今之翁江矣原出翁源縣東北展旗山西流逕縣城南至英德縣東南合溱下流曰澧江也

莽曰棊武

本作基武依水經注改

陰山

在今衡州府衡山縣東元和郡縣志衡山縣本漢陰山縣也以縣東百二十里有陰山為名水經洙水西北過

攸縣南又過陰山縣南

松按原志作陽山應邵注曰今陰山也蓋謂後漢之陰山即前

漢之陽山錢氏改此志為陰山非是

侯國

水經注陽山故孝王子宗之邑也言其勢王故塹山堙谷改曰陰山縣是以陽山縣改稱陰山非別立縣矣本或無陽山縣下侯國二字疑是

武陵郡高帝置

水經注秦昭襄王三十年取楚巫黔及江南地以為黔

中郡漢高祖二年割黔中故治爲武陵郡
莽曰建平屬荊州戶三萬四千一百七十七口十八萬五
千七百五十八縣十三

索

在今常州府城北卽漢壽故城也順帝陽嘉中更名水
經注縣治卽索縣故城如淳音繩索之索

漸水東入沅

水經注澹水出漢壽縣西楊山南流東折逕其縣南關
駟以爲興水亦曰漸水也水所入之處謂之鼎口今鼎
口水在龍陽縣東北

孱陵

在今荊州府公安縣西二十五里後漢書注故城在公
安縣西應邵讀孱爲踐

莽曰孱陸

臨沅

今常德府城後漢書注故城在武陵縣

莽曰監沅

本或作監元監原並非依水經注改松按王校同

沅陵

今辰州府城元和郡縣志辰州縣也閻氏若璩曰秦黔中郡治沅陵縣故

郡城在唐辰州沅陵縣西二十里

莽曰沅陸

鐔成

今沅州府黔陽縣應邵音淫孟康音譚松按宋本漢志作潭成

康谷水南入海

疑卽水經浪水也云出武陵鐔成縣北界沅水谷南至潭中縣與鄰水合又東至猛陵爲鬱溪又至高要縣爲大水東至番禺縣入于海據之則亦鬱水之上原也山海經禱過之山浪水出焉康谷禱過以聲相近而異稱玉山潭水所出東至阿林入鬱

卽今之融江也原出懷遠縣西北山東南流逕縣城東折西南逕融縣東羅城縣西折南逕柳城縣西入于柳江

過郡二行七百二十里

過桂陽鬱林二郡段氏玉裁曰過武陵鬱林二郡當從之

無陽

今思州府地洪氏亮吉日今沅州府治漢無陽地又曰無陽隨代改名水亦因之以改三國吳時

名灘陽晉宋書作舞陽則水亦作灘與舞矣唐名武谿又曰巫溪置巫州則水亦作武與巫矣水又稱雄溪亦作熊溪明世名鎮陽江亦曰鎮南江其隨地易名在黃平州曰黃平河又曰西門河在施秉縣曰洪江亦曰大江江在鎮遠府曰鎮陽江又曰鎮洋江在思州府曰灘陽江在青溪縣曰青溪江在玉屏縣曰平江亦曰平溪統名曰

無水首受故且蘭南入沅

今日洪江也原出黃平州南金鳳山北流逕州城東又北折東逕施秉縣南鎮遠府城南鎮遠縣北思州府城

南沅州府城南又曲曲流逕黔陽縣西南入沅江
行八百九十里

松按今本脫行字
錢校補王校同

遷陵

今永順府保靖縣水經注延江水東南入遷陵縣又云
酉水東逕遷陵縣北又逕酉陽縣南

莽曰遷陸

辰陽

今辰州府辰溪縣後漢書注今辰溪縣也屈原九章朝
發枉渚夕夙辰陽王逸曰地名

三山谷辰水所出南入沅

山在今辰州府城東二百四十里辰水今日麻陽河也
原出銅仁府西北順溪南流折東逕府城南麻陽縣南
至辰溪縣南入沅江
行七百五十里莽曰會亭

松按今本脫行字
錢校補王校同

酉陽

在今辰州府城西

義陵

今辰州府溆浦縣
閻氏若璩曰元和志云漢改秦黔中
為武陵郡移理義陵今辰州溆浦縣
是則義陵
為郡治矣

鄜梁山序水所出西入沅

今日雙龍江也有二原南原曰龍潭河東原曰龍灣河合西北流逕激浦縣南又西過小江口又西至大江曰入沅

莽曰建平

佷山

在今宜昌府長陽縣西孟康音恒水經注今世以銀為

音也段氏玉裁曰鄭氏所言今音非古語也古語佷讀恒如銅之讀紂

零陽

在今澧州石門縣西水經注零溪水注于澧今日九溪

也九水彙流逕慈利縣西北入澧

充

今澧州慈利縣地後漢書注故城在崇義縣東北

酉原山酉水所出南至沅陵入沅

關駟謂之受水今日北河原出酉陽州西南平茶司東

流逕龍山縣南保靖縣北永順府城南折東南至辰州

府城西入沅

歷山澧水所出東至下雋入沅

澧水出今桑植縣西北三原彙合于縣東南東流折南

又東逕永定縣南慈利縣北石門縣南澧州南折南至

安鄉縣南入洞庭湖今日陵江湖也水經澧水入江注

入沅者其枝瀆耳

過郡二行一千二百里

過武陵長沙二郡

零陵郡武帝元鼎六年置

分桂陽置

錢氏大昕曰當云故屬長沙

莽曰九疑屬荊州戶二萬一千九十二口十三萬九千三百七十八縣十

零陵

今永州府東安縣後漢書注今永州縣也

陽海山

山在今桂林府興安縣南九十里說文解字曰郡國志作陽朔山

湘水所出北至鄱入江

水出今興安縣南陽朔山北流曰海陽江逕縣城北又

東北逕全州西南東安縣東南永州府城西北祁陽縣

南常甯縣西北衡州府東衡山縣東南又北流逕湘潭

縣東長沙府城西湘陰縣西又北入洞庭湖

過郡二行二千五百三十里

過零陵長沙二郡

又有離水東南至廣信入鬱林

水出今陽朔山北流曰海陽江又北為分湘離灑逕興

安縣東北而折西流又南逕靈川縣東環桂林府城又

南逕陽朔縣東平樂府城西昭平縣東梧州府城西入

鬱江

段氏玉裁曰湘離同源南為離水北則湘川王氏念孫曰林字亦後人所加水經云離水出陽海山

南至廣信縣入于鬱水是也

行九百八十里

營道

在今永州府道州西四十里後漢書注今道州縣水經注有營水故以氏縣今日泥江原出九疑山東北入湘

水 松按一統志言營道在甯遠西則當在道州東

九疑山在南

山在今永州府甯遠縣南六十里括地志在唐興縣東南一百里說文解字作疑湘中記九山相似行者疑惑故曰九疑皇覽其下九溪皆相似郡國志九疑有九峯一曰丹朱二曰石城三曰樓溪四曰娥皇五曰舜原六

曰女英七曰蕭韶八曰紀九曰杞林

莽曰九疑亭

始安

今桂林府城太平寰宇記臨桂縣也水經注縣故零陵之南部也

夫夷

在今寶慶府武岡州東北二百四十里通典後漢書注並云故城在武岡縣東北後漢書第五倫傳作扶夷以夫水得稱夫水今日羅江也原出新甯縣南東北流入資水

松按一統志言夫夷在新甯東北則當在武岡東南矣

營浦

今永州府永明縣

都梁

在今武岡州東五里

侯國

武帝元朔五年封長沙定王子定

路山資水所出東北至益陽入沅

路山水經注曰唐糾山蓋別名也在今武岡州西南水

今日都梁水也原曰楓門山水東南流高坪山水東北

流合而東出山逕州城南又逕紫陽司南折而東逕寶

慶府城北曰紫陽江又東折而西北逕新化縣北又折

西南逕安化縣西益陽縣南曰資江又逕沅江縣南入

湖

過郡二行千八百里

過零陵長沙二郡

洽道

在今永州府甯遠縣東四十里說文解字作伶道洽伶

古字通

莽曰洽陵

泉陵

在今永州府城北二里通典後漢書注並云故城在零

陵縣北

閻氏若璩曰水經注云泉陵縣零陵郡治漢武帝元鼎六年分置

侯國

武帝元朔五年封長沙定王子賢表作眾陵侯字誤也
莽曰溥閭

水經注閭作潤

洮陽

在今桂林府全州北三十五里通典故城在今縣西北
後漢書注在湘原縣西北如淳讀洮為韜洮亦水名原
出全州北文山流入湘水

莽曰洮治

鍾武

在今衡州府城西八十里應邵曰永建二年更名重安
莽曰鍾桓

新輯注地里志卷第十

